



Broj: 01-50-1-15-10/07
Sarajevo, 13. juna 2007. godine

ZAPISNIK

10. sjednice Predstavničkog doma
Parlamentarne skupštine Bosne i Hercegovine,
održane 13. juna 2007. godine

Sjednica je počela u 10,05 sati. Prisustvovalo je 36 poslanika. Opravdano su odsustvovali: Husein Nanić, Azra Hadžiahmetović, Selim Bešliagić, Niko Lozančić, Jerko Ivanković Lijanović i Remzija Kadrić.

Iz Vijeća ministara BiH sjednici su prisustvovali:

Iz međunarodnih organizacija sjednicu su pratili predstavnici: OHR-a, OSCE-a, NDI, kao i nevladinih organizacija Centra civilnih inicijativa i Centra za promociju civilnog društva.

U uvodnim napomenama predsjedavajući Belkić ukratko je obrazložio izmjene dnevnog reda predloženog u pozivu za sjednicu.

Denis Bećirović predložio je da se u dnevni red uvrsti razmatranje informacije o stanju i trendovima na tržištu rada u BiH od juna 2006. do juna 2007. godine, s posebnim osvrtom na definiranje strategije na međunarodnom planu u oblasti rada i zapošljavanja.

Milorad Živković predložio je da se s dnevnog reda skine Potvrđivanje Odluke Predsjedništva BiH o utvrđivanju kandidata za generalske pozicije u Oružanim snagama BiH, jer ima saznanja da predložena lica imaju ograničenu dozvolu NATO-a.

Zlatko Lagumdžija predložio je da se u dnevni red ove ili naredne sjednice uvrste dvije tačke, i to:

- Rasprava o pitanjima sadržanim u pismu Ollija Rehna, od 8. maja 2007. godine i
- Informacija Vijeća ministara BiH o realizaciji zaključaka Predstavničkog doma usvojenih uz Zakon o Budžetu institucija BiH i međunarodnih obaveza BiH za 2007. godinu, s posebnim naglaskom na:
 - a) usvajanju Zakona o plaćama u institucijama BiH i
 - b) osnivanju svih komisija koje je osnovalo Vijeće ministara BiH u prethodnom sazivu, izvještaju o razlozima za njihovo osnivanje i troškovima za njihov rad.

O prijedlogu Milorada Živkovića govorio je zamjenik ministra odbrane Igor Crnadak, koji je potvrdio da krajem augusta ove godine ističu privremene dozvole određenim kandidatima i da je, stoga, sugestija i prijedlog Ministarstva da se predmetna tačka skine s dnevnog reda ove sjednice.

U raspravi o ovom pitanju učestvovali su Šefik Džaferović i Mirko Okolić.

U raspravi o prijedlogu dnevnog reda Drago Kalabić podsjetio je na zaključak Doma s prethodne sjednice, kojim je obavezano Vijeće ministara BiH da do ove sjednice u proceduru dostavi Sporazum sa Srpskom pravoslavnom crkvom, pa je pitao zašto nije ispoštovan Zaključak Doma.

Predsjedavajući Belkić odgovorio je da je od Vijeća ministara BiH dostavljeno obavještenje da je kod njih završena procedura u vezi s ovim sporazumom i da je on dostavljen Predsjedništvu BiH, koje je nadležno da Sporazum dostavi u parlamentarnu proceduru, te da je i poslanicima podijeljeno obavještenje Vijeća ministara BiH.

O pomenutom sporazumu kratko je govorio Momčilo Novaković.

Denis Bećirović je u ponovnom javljanju sugerirao Kolegiju da se malo konzistentnije strukturira dnevni red navodeći uz pojedine tačke na šta se šta odnosi, uzimajući za primjer zaključak Azre Hadžiahmetović.

Poslije rasprave o prijedlogu dnevnog reda, predsjedavajući Belkić predložio je da se prijedlozi tačaka koje su iznijeli Denis Bećirović i Zlatko Lagumdžija uvrste u dnevni red naredne sjednice Doma. Na ovaj prijedlog nije bilo primjedbi, pa je predsjedavajući na glasanje dao prijedlog Milorada Živkovića da se s dnevnog reda skine Potvrđivanje Odluke Predsjedništva BiH o imenovanju kandidata na generalske pozicije u Oružanim snagama BiH.

Intervenirao je Jozo Križanović rekavši da je shvatio da je predstavnik Ministarstva odbrane BiH povukao predloženu odluku.

Predsjedavajući Belkić odgovorio je da je Milorad Živković predložio skidanje tačke, a da je zamjenik ministra odbrane iznio stav Ministarstva i da je na Domu da o tome odluči. Zatim je proveo glasanje o prijedlogu.

Sa 24 glasa "za" (Federacija BiH 13, RS 11), tri "protiv" i pet "suzdržanih", skinuta je s dnevnog reda tačka - Potvrđivanje Odluke Predsjedništva BiH o utvrđivanju kandidata za generalske pozicije u Oružanim snagama BiH.

Predsjedavajući je, zatim, konstatirao da 10. sjednica Predstavničkog doma ima sljedeći

DNEVNI RED

1. Usvajanje Zapisnika 9. sjednice Predstavničkog doma;
2. Poslanička pitanja i odgovori;
3. Izvještaj komisije Kolegija o nastojanju za postizanje sporazuma o prijedlogu zaključka poslanika Azre Hadžiahmetović u vezi sa Zakonom o izmjeni Zakona o privremenoj zabrani raspolaganja državnom imovinom Bosne i Hercegovine;
4. Zahtjev poslanika Beriza Belkića za razmatranje Prijedloga zakona o Memorijalnom centru „Srebrenica – Potočari“, spomen-obilježje i mezarje za žrtve genocida iz 1995. godine po hitnom postupku, u skladu s članom 127. Poslovnika;
5. Zahtjev poslanika Ekrema Ajanovića za razmatranje Prijedloga zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti po skraćenom postupku, u skladu s članom 126. Poslovnika (primjena novog poslovnika);
6. Prijedlog zakona o radijacijskoj i nuklearnoj sigurnosti u Bosni i Hercegovini - drugo čitanje (primjena starog poslovnika);
7. Prijedlog zakona o izmjeni Zakona o Službi u oružanim snagama BiH - drugo čitanje (primjena starog poslovnika);
8. Prijedlog zakona o visokom obrazovanju u Bosni i Hercegovini - prvo čitanje (primjena starog poslovnika);
9. Prijedlog zakona o Agenciji za predškolsko, osnovno i srednje obrazovanje - prvo čitanje (primjena starog poslovnika);
10. Prijedlog zakona o izmjenama i dopunama Zakona o Vijeću ministara BiH (Zakon broj 01,02-02-9-35-4/06, od 8.9. 2006.) - prvo čitanje - (primjena starog poslovnika);
11. Prijedlog zakona o izmjeni Zakona o administrativnim taksama BiH - prvo čitanje (primjena novog poslovnika),
12. Razmatranje Inicijative Denisa Bećirovića sa 9. sjednice Doma, održane 23.5.2007.;
13. Davanje saglasnosti za ratifikaciju:
 - a) Evropske povelje o regionalnim ili manjinskim jezicima – Strazbur, 5.novembra 1992.godine,
 - b) Konvencije za objedinjavanje određenih propisa u međunarodnom zračnom saobraćaju,
 - c) Sporazuma između Vijeća ministara BiH i Vlade Republike Hrvatske o saradnji i nadzoru prelaska granice,
 - d) Privremenog ugovora o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu.

Ad – 1. Usvajanje Zapisnika 9. sjednice Predstavničkog doma

U uvodnim napomenama predsjedavajući Belkić skrenuo je pažnju poslanicima na odredbu člana 86. Poslovnika koja se odnosi na zapisnike sjednica Doma, povodom zahtjeva da se u zapisnike unose i obrazloženja poslaničkih pitanja.

O Zapisniku 9. sjednice nije bilo rasprave, pa je usvojen jednoglasno (sa 32 glasa).

Ad – 2. Poslanička pitanja i odgovori

Predsjedavajući Belkić konstatirao je da su odgovore na pitanja do ove sjednice dobili: Remzija Kadrić, Sadik Bahtić, Hadži Jovan Mitrović, Denis Bećirović, Milorad Živković, Slavko Jovičić, Lazar Prodanović, Sefer Halilović i Rifat Dolić.

Odgovore na pitanja komentirali su: Slavko Jovičić, Sadik Bahtić, Hadži Jovan Mitrović, Sefer Halilović i Denis Bećirović.

Komentirajući odgovor na pitanje Slavko Jovičić je ponovo postavio pitanje, odnosno zahtjev da mu se dostavi informacija o tome: „ko sve u Vijeću ministara BiH i u svim drugim institucijama BiH, bez obzira na dužnost i položaj, koristi te, sasvim je jasno, neopravdane privilegije“. Dodao je i da je u pregledu poslaničkih pitanja netačno navedeno da je on dobio odgovor na ovo pitanje.

Postavljena su nova poslanička pitanja kako slijedi:

Martin Raguž:

„1. Dokle je stigla istraga vezana za smrt Ive Bartulovića (67), povratnika u banjalučko mjesto Barlovci, koji je 25.5.2007. na svom obiteljskom imanju brutalno pretučen, od čega je i preminuo? Tko su počinitelji, šta su motivi i šta su do sada uradili nadležni državni i organi RS-a?

2. Kakvo je trenutno stanje sigurnosti u BiH, s posebnim naglaskom na sigurnost povratnika?“

Sadik Ahmetović:

„Molim da mi se odgovori sa da ili ne. Postoje li osobe u Bosni i Hercegovini koje predstavljaju opasnost za nacionalnu sigurnost zemlje? Tražim da se imena tih osoba dostave parlamentarnoj Komisiji za nadzor Obavještajne službe u BiH. Tražim da mi Obavještajna služba i SIPA odgovore da li postoje ili ne takve osobe (bez njihovih imena)“.

Vinko Zorić:

„Pokrećem inicijativu da se sjednica ovog doma ne zakazuje između 25.12. 2007. i 8.1.2008. godine“.

Šefik Džaferović:

1. „Ja imam obavezu još iz ranijeg saziva, pošto nisam dobio odgovor, da aktueliziram pitanje koje se tiče obespravljenih radnika iz Udruženja „UGOR“ iz Jelaha kod Tešnja. Predstavnički dom je 2005.godine usvojio zaključke kojima je obavezano Vijeće ministara BiH da preduzme određene aktivnosti kako bi ti radnici došli do svojih prava koja su stekli po osnovu rada 90-ih godina u Republici Hrvatskoj. Ja sada ponavljam to svoje pitanje i tražim od Vijeća ministara BiH da konačno Parlamentu dostavi odgovor.“

2. „Pitam Vijeće ministara BiH - u kojoj se fazi nalaze pregovori o Ugovoru o imovinskim odnosima i Ugovoru o socijalnom osiguranju BiH sa svim državama nastalim raspadom bivše SFRJ? Odgovor je potrebno dati za svaku državu i svaki ugovor posebno. Nakon odgovora tražim tačku dnevnog reda na sjednici Doma“.

Rifat Dolić:

„1. Pitanje nadležnom resornom ministarstvu ili instituciji u BiH:

Šta možete preduzeti na zaštiti arheološkog blaga BiH koje je u ratnom i poratnom periodu izloženo nebrizi, uništavanju i iznošenju van granica BiH?“

„2. Pitanje ministru prometa i komunikacija i Vijeću ministara BiH:

Kakav je aktuelni status luke Ploče u bilateralnim odnosima BiH s Republikom Hrvatskom i kojim sporazumom i kada je reguliran taj status? Da li je u bilo kakvom opticaju u bilateralnim razgovorima s Republikom Hrvatskom luka Rijeka na čije korištenje je prije rata s razlogom geostrateški bila naslonjena cijela Bosanska krajina i šire?“

Sadik Bahtić:

1. „Nova pitanja za Vijeće ministara BiH, predsjedavajućeg Vijeća ministara BiH gospodina Nikolu Špirića.

Kada će Vijeće ministara BiH krenuti s provođenjem ekonomskih reformi, onih reformi koje ste prezentirali u dijelu ekspozee ekonomskog programa ovdje a koje smo mi usvojili sa 31 glasom?

2. Tražim od Državne agencije za rad i zapošljavanje da mi odgovori na sljedeća pitanja:

Spisak svih putovanja u inostranstvo po mjesecima za period od 1.1. do 31.12. 2006.godine te od 1.1. do 1.6.2007.godine.

Odgovor treba da sadrži: ime i prezime osoba koje su putovale za svaki mjesec; ukupan broj delegacija za svako putovanje; koje su sve zemlje posjećene u navedenim periodima; sva putovanja u Republiku Sloveniju u periodu od 1.1. do 1.6.2007.godine i, što je najbitnije, koji su efekti tih putovanja i da li je potpisan ijedan sporazum? I tražim iznose telefonskih računa za period od 1.1. do 31.12. 2006.godine i ovaj period.“

Azra Alajbegović:

„Kancelariji za veterinarstvo pri Ministarstvu spoljne trgovine BiH i državnom veterinarskom inspektoru:

Prvo, da mi se dostavi baza podataka Agencije za obilježavanje životinja BiH kao i da se ona stavi na raspolaganje ministarstvima vodoprivrede, poljoprivrede i šumarstva Federacije BiH, Republike Srpske i nadležnim kantonalnim ministarstvima.

Postavljam u isto vrijeme pitanje kada će se riješiti pitanje ušnih markica za životinje i pasoša za životinje, te molim također da mi se dostavi izvještaj o problemima koji su nastali u vezi s većim epidemiološkim parametrima ovih zoonoza prilikom donošenja državnog zakona o javnom zdravlju. Također molim da mi se dostavi izvještaj o problemima vezanim za prestanak vršenja dužnosti bivšeg direktora Agencije za obilježavanje životinja Slavena Grbića i posljedice koje su po ovu endemijsku pojavu izazvale situacije s tom ostavkom.

Zatim bih molila da mi se odgovori na pitanje kako se vrši provjera doniranih životinja povratnicima u RS i u Federaciju BiH, pošto smo svjedoci da je ovih dana izvršena autanazija na 68 ovaca i jagnjadi u Bajramovićima kod Srebrenice koji su bili donirani.

I u isto vrijeme pitam nadležno ministarstvo i Vijeće ministara BiH šta su uradili po pitanju zaključaka koji su prosljeđeni sa simpozijuma o brucelozi prošle godine koji je održan u Sarajevu, osobito entitetskim ministarstvima i Državnom uredu za veterinarstvo.

Također molim da mi se dostavi izvještaj o praćenju obavezne vakcinacije protiv bruceloze u BiH kao i izvještaj o opremljenosti Zavoda za patologiju Veterinarskog fakulteta i laboratorije za imunocitohemiju Veterinarskog fakulteta. Bez obzira što termička obrada mesa i mlijeka koji su izvor zaraze mogu biti profilaksa zoonozama, smatram da u ovom trenutku faza endemskih žarišta je i potreba da se hitno obezbijede sanitarne klaonice za eutanaziju životinja i sanitarno zbrinjavanje tako umorene stoke.

I moje drugo pitanje postavila bih Ministarstvu civilnih poslova a to je - da li su ispoštovali preporuku Agencije za državnu službu broj: 0334848-16/06, od 9.5.2007.godine, o mišljenju za radno mjesto rukovodećeg državnog službenika u Ministarstvu civilnih poslova BiH, na poziciju pomoćnik ministra u Sektoru za zdravstvo."

Zlatko Lagumdžija:

„Ja bih želio da dobijem odgovor na pitanje koje upućujem Ministarstvu finansija i nadležnim poreskim organima, tako da bi se dobila potpuna slika o slučaju Zlatka Lagumdžije. Pošto je u odgovoru na poslaničko pitanje od 28.2. ove godine odgovoreno da - citiram: „ prof. Zlatko Lagumdžija nije počinio krivična djela i da je nakon istražnih radnji obustavljen krivični postupak, odnosno neće se voditi – tražim da se precizno odgovori i na to da li je i koliko poreskih obaveza prof. dr. Zlatko Lagumdžija od 1998. do 2007., i to po godinama, po osnovu poreza na lični prihod građana platio i da li ima i eventualno koliko poreskih obaveza koje nisu izmirene?“

Adem Huskić:

Prije nego što postavim pitanje moram reći da sam zaista razočaran ovom tačkom dnevnog reda i sugeriram Kolegiju da razmisli kako je ubuduće koncipirati.

Ja ću vrlo kratko da postavim pitanje: "na koji način su utrošena sredstva od prodaje zemljišta Ambasadi SAD-a u Sarajevu?"

Denis Bećirović:

1. „Koliko su tačna mjesečna primanja predsjedavajućeg Vijeća ministara BiH, ministara i zamjenika u Vijeću ministara BiH, te svih direktora javnih institucija (direkcija, agencija, ureda, uprava instituta...) koje se finansiraju iz Budžeta Bosne i Hercegovine u 2007. godini? Pitanje postavljam ministru finansija i trezora.“

2. Da li je Ministarstvo za ljudska prva sačinilo spisak građana BiH kojima je oteta ili uzurpirana privatna imovina od strane vjerskih zajednica? Ako jeste, tražim da mi se dostavi spisak tih građana sa sljedećim podacima: ime i prezime, općina, tačna adresa i podatak koja je vjerska zajednica odgovorna za kršenje elementarnog ljudskog prava na uživanje privatne imovine? Pitanje postavljam ministru za ljudska prava i izbjeglice.“

3. „Da li je Ministarstvo za ljudska prava sačinilo spisak građana BiH koji, još uvijek, 12 godina od potpisivanja Dejtonskog mirovnog sporazuma, ne mogu da ostvare svoje pravo na povrat i uživanje privatne imovine? Ako jeste, tražim da mi se dostavi spisak tih građana sa sljedećim podacima: ime i prezime, općina, tačna adresa i podatak koji je organ, institucija ili osoba odgovorna za kršenje elementarnog ljudskog prava na uživanje privatne imovine?“

Sefer Halilović:

1. „Pitanje je upućeno predsjedavajućem Vijeća ministara BiH gospodinu Nikoli Špiriću i ministru finansija gospodinu Draganu Vrankiću. Da li je BiH izvršila obaveze po presudi Evropskog suda za ljudska prava o predmetu 41183/02 Jeličić protiv BiH itd.? Sad da ne obrazlažem. Ako jeste, iz kojih sredstava? Ako nije, koje su posljedice za Bosnu i Hercegovinu koje će prouzrokovati odbijanje izvršenja presude Evropskog suda?“

2. Da li je pokrenut krivični postupak protiv odgovornih u BiH zbog nepoštivanja odluka bivšeg Doma za ljudska prava, po predstavkama vlasnika stare devizne štednje?

3. Kakav je stav Vijeća ministara BiH o izvršenju presude za isplate stare devizne štednje? Ko će snositi posljedice neprovođenja izvršnih sudskih presuda s obzirom na činjenicu da je Zakonom o izmirenju obaveza po osnovu računa stare devizne štednje isključivu odgovornost preuzela Bosna i Hercegovina? Šta je s tužbama deviznih štediša koje sudovi ne procesuiraju i traži se da se ovom parlamentu dostavi informacija od Visokog sudskog i tužilačkog vijeća o broju i statusu ovih tužbi pokrenutih pred sudovima u BiH i krivičnih prijava kod Tužilaštva BiH? Zašto sudovi ne uzimaju u razmatranje ove tužbe? Zašto Tužilaštvo BiH šuti? Da li će isključivo posljedice neprocesuiranja tužbi ići na teret BiH, koja se po zakonu proglasila odgovornom? Da li će se BiH oglušiti i na konstatacije Evropskog suda?...

4. U Sporazumu o pitanjima sukcesije.. Bosni i Hercegovini pripao je koeficijent 15,50%. Za koje komercijalne banke u BiH i s kojim iznosima devizne štediša u tim bankama je izračunat koeficijent raspodjele finansijskih sredstava za BiH u odnosu na ukupnu štednju u bankama u SFRJ? Posebno pitanje, da li je kod utvrđivanja koeficijenta za raspodjelu finansijskih sredstava za BiH uračunata i devizna štednja položena kod Jugobanke d.d. Sarajevo koja je bila banka kćerka Jugobanke d.d. Beograd – ovlaštene banke?

5. Šta je BiH preduzela u skladu s Dodatkom 1. Aneksa C Sporazuma o pitanjima sukcesije?

6. Šta je sa sredstvima koja su prema članu 5. Aneksa C Sporazuma o pitanjima sukcesije doznačena BiH? Da li su ova sredstva deponovana na escrow računu? Ako nisu, gdje su usmjerena, po čijoj odluci?

7. Koji su iznosi devizne štednje po bankama koji su raspadom SFRJ ostali izvan kontrole banaka iz BiH? Traži se pregled ovih potraživanja...

8. Koji je stav Vijeća ministara BiH u vezi s deviznom štednjom državljana BiH u bankama Hrvatske, Slovenije i Srbije? Da li će BiH preduzeti ikakve mjere u zaštiti prava svojih građana...?

9. Da li je Dom naroda usvojio izmjene i dopune Zakona o izmirenju obaveza po staroj deviznoj štednji...?

10. Ko vrši kontrolu rada agencija iz člana 7. Zakona o izmirenju obaveza po osnovu računa stare devizne štednje? Na kome leži odgovornost zbog nezakonitih postupanja agencija i ko će snositi posljedice manipulacija deviznom štednjom u postupku verifikacije? Do kada Vijeće ministara BiH misli manipulirati deviznom štednjom predlaganjem izmjena i dopuna Zakona? Koje su posljedice ovakve politike i ko će snositi odgovornost?

11. Koje su posljedice produženja rokova verifikacije devizne štednje...? Na kome leži odgovornost za ovakva postupanja?

12. Koje su posljedice prijedloga da se rok za verifikaciju produži do kraja 2007. godine? Pravna nesigurnost po štediša?

13. Traži se dostavljanje pregleda verificiranih deviznih računa, vrijednost izračunatih potraživanja po vlasniku računa i pregled isplaćenih ili obračunatih isplata u gotovini po svakom od tih zbirnih računa?

14. Šta je s tužbama deviznih štediša koje sudovi ne procesuiraju? Traži se da se ovom parlamentu dostavi informacija od strane Visokog sudskog i tužilačkog vijeća o broju i statusu ovakvih tužbi pokrenutih pred sudovima u BiH i krivičnih prijava kod Tužilaštva BiH...?

15. Traži se pregled svih isplata devizne štednje po bankama od maja 1991. godine do danas koje su izvršile banke u BiH.“

„I drugo kratko pitanje, po pisanju medija, raspisani tender za izgradnju mosta na Pelješcu, na javnoj raspravi o namjeri izgradnje mosta, kopno-Pelješac, koja je održana u Neumu, nije data saglasnost niti je moguće dati, izdati ovakvu saglasnost od strane BiH za gradnju ovog mosta, pitanje je upućeno ministru prometa i komunikacija, doktoru Boži Ljubiću. Da li je gospodin ministar Božo Ljubić potpisao saglasnost u ime BiH za izgradnju mosta kopno-Pelješac?“

Šemsudin Mehmedović:

Imam jedno kratko pitanje a ono je upućeno Upravi za indirektno oporezivanje BiH i glasi:

"Na osnovu kojeg zakona se za bilo koje pitanje u pogledu tumačenja propisa iz djelokruga rada Uprave za indirektno oporezivanje BiH, osim što se mora podnijeti pismeni podnesak, naplaćuje i administrativna taksa u iznosu od 50 KM, pozivajući se na tarifni broj 83 tarife administrativne takse? Ukoliko je to utemeljeno na nekom zakonu, podnosim inicijativu Vijeću ministara BiH da se on mijenja jer je dovoljno što pravni subjekti plaćaju porez, te da je administracija dužna da daje pravno tumačenje iz djelokruga svoga rada, bez posebne naknade.“

Hadži Jovan Mitrović:

„Ovo pitanje koje ću postaviti, mislim da je u više navrata postavljano od strane poslanika, ali evo želim i ja da postavim to pitanje iz razloga što se odnosi konkretno na Zvornik, odakle dolazim.“

Tražim od Savjeta ministara BiH da mi odgovori – šta je do sada urađeno po pitanju naknade za potopljeno zemljište u akumulaciji Hidroelektrane Mali Zvornik kao i naknade za održavanje priobalja?“

Momčilo Novaković:

„S obzirom da ovih dana ima dosta priče o racionalizaciji u DKP mreži, a posebno dilema oko kriterija vezanih za to, Ministarstvu inostranih poslova BiH postavljam pitanje:

"Na osnovu kojih kriterija Ministarstvo inostranih poslova gasi konzulat u jednom i premješta ga u drugi grad? Radi se o konzularnoj mreži u Njemačkoj i da li o tome postoji puna saglasnost u Ministarstvu? U kojim zemljama BiH ima ambasade a da te zemlje nemaju ambasade u BiH i koji su kriteriji kojim su se rukovodile vlasti u BiH kod otvaranja ambasada u tim zemljama?"

Drugo pitanje, Savjet ministara BiH je Odlukom broj 35/07, od 22.3.2007.godine, promijenio titulara imovine na određenim nekretninama, i pored činjenice da je na snazi bio Zakon o zabrani raspolaganja državnom imovinom. Baveći se tim, utvrdio sam da je razlog za ovakvu odluku izbjegavanje plaćanja zakupnine Federaciji BiH za te nekretnine.

Moje pitanje glasi – odnosno, tražim od Savjeta ministara BiH da mi dostavi spisak imovine čiji je titular SRBiH ili je ona predmet sukcesije a na koju institucije BiH plaćaju zakupninu iz budžeta institucija BiH?

Drugo, da se dostavi iznos sredstava koji se plaća za zakup ovih nekretnina i to do formiranja zajedničkog ili jedinstvenog računa i poslije njegovog formiranja posebno.“

Branko Dokić:

„Pokrećem inicijativu da se tačka dnevnog reda „Poslanička pitanja i odgovori“ ograniči maksimalno na jedan čas. Da se na početku časa ustanovi broj poslanika koji žele postavljati pitanja i da se na osnovu toga utvrdi maksimalan broj minuta po poslaniku kako bi se uklopili u 60 minuta.“

Selim Bešlić (dostavljeno u pisanoj formi):

Vijeću ministara BiH i Upravi za indirektno oporezivanje BiH postavio je pitanja:

“1. Da li postoji zakonska obaveza da se na sredstva etažnih vlasnika (zajednička pričuva), namijenjena za upravljanje i održavanje zajedničkih dijelova i uređaja zgrade, plaća porez na dodatu vrijednost (PDV)?

2. Da li postoji zakonska obaveza da upravitelj zgrade, prilikom izvršenog obračuna svakom etažnom vlasniku na njegovo zaduženje mjesečne naknade na ime upravljanja i održavanja zajedničkih dijelova i uređaja zgrade, obračunava i odmah uplaćuje PDV, bez obzira da li će vlasnik ta etažna sredstva uplatiti?

3. Može li inspeksijska kontrola Uprave za indirektno oporezivanje Banja Luka, Regionalni centar Tuzla po nalogu svojih neposrednih rukovodilaca i usmenih uputstava (slobodnog tumačenja), primijeniti metod da sve ono što nije izričito precizirano odredbama Zakona o PDV-u bude oporezivo i to retroaktivno za 16 mjeseci?“

Ad – 3. Izvještaj komisije Kolegija o nastojanju za postizanje sporazuma o prijedlogu zaključka poslanika Azre Hadžiahmetović u vezi sa Zakonom o izmjeni Zakona o privremenoj zabrani raspolaganja državnom imovinom Bosne i Hercegovine

Predsjedavajući je podsjetio da je u Kolegiju kao komisiji postignuta saglasnost o prijedlogu zaključka, te da se po novom Poslovniku o njemu ponovo glasa.

Šefik Džaferović rekao je da se glasa u drugom krugu, na što je sekretar Doma Branka Todorović upozorila da je novim Poslovnikom propisano da se ponovo glasa. Predsjedavajući je zatim proveo glasanje o prijedlogu zaključka.

"Za" zaključak je glasalo 20 (iz Federacije BiH 17, iz Republike Srpske tri), a "suzdržalo" se devet poslanika.

Predsjedavajući je konstatirao da prijedlog zaključka ponovo nije dobio entitetsku većinu.

Intervenirao je Šefik Džaferović upozorivši ponovo da je ovo drugi krug glasanja o prijedlogu zaključka, nakon usaglašavanja u Kolegiju kao komisiji.

Predsjedavajući Belkić zatražio je da sekretar Doma objasni poslanicima poslovničku odredbu.

Sekretar Doma Branka Todorović podsjetila je poslanike da je članom 80. stav 3. propisano da se, ako Kolegij uspije postići saglasnost, o tome obavještava Dom, poslije čega se glasa u skladu s članom 79. Poslovnika, te da u ovom slučaju predloženi zaključak ponovo ide na usaglašavanje.

Predsjedavajući Belkić konstatirao je da ni ovog puta prijedlog zaključka nije dobio entitetsku većinu i da će se provesti ponovno usaglašavanje u Kolegiju kao komisiji.

Ad – 4. Zahtjev poslanika Beriza Belkića za razmatranje Prijedloga zakona o Memorijalnom centru „Srebrenica – Potočari“, spomen-obilježje i mezarje za žrtve genocida iz 1995. godine po hitnom postupku, u skladu s članom 127. Poslovnika

Beriz Belkić je, u svojstvu predlagača, podnio Domu obrazloženje Prijedloga zakona i zahtjeva za hitni postupak.

Nije bilo rasprave pa je odmah provedeno glasanje o zahtjevu za hitni postupak.

"Za" zahtjev je glasao 21 poslanik ((Federacija BiH 20, RS jedan), "suzdržalo" se osam poslanika.

Predsjedavajući je konstatirao da zahtjev za proceduru nije dobio entitetsku većinu i da slijedi usaglašavanje u skladu s Poslovníkom.

Ad – 5. Zahtjev poslanika Ekrema Ajanovića za razmatranje Prijedloga zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti po skraćenom postupku, u skladu s članom 126. Poslovnika (primjena novog poslovnika)

Ekrem Ajanović ukratko je obrazložio prijedlog zakona.

U kraćoj raspravi učestvovali su Martin Raguž i Branko Dokić.

Predsjedavajući je proveo glasanje.

"Za" zahtjev za proceduru glasalo je 20 (Federacija BiH 19, RS jedan), "protiv" su glasala četiri, "suzdržalo" se 11 poslanika.

Predsjedavajući je konstatirao da i o ovom zahtjevu slijedi usaglašavanje u Kolegiju kao komisiji zbog nedostatka entitetske većine.

Ad – 6. Prijedlog zakona o radijacijskoj i nuklearnoj sigurnosti u Bosni i Hercegovini - drugo čitanje

Predsjedavajući Belkić je u kraćim uvodnim napomenama rekao da je, nakon odgađanja izjašnjavanja o ovom prijedlogu zakona, izvršeno određeno usaglašavanje o podnesenim amandmanima.

Lazar Prodanović upoznao je Dom o usaglašenim amandmanima. U ime Ustavnopravne komisije kratko je govorio Šefik Džaferović.

Predsjedavajući Belkić zatim je proveo glasanje o korigiranim amandmanima Lazara Prodanovića o kojima je u Komisiji postignuta saglasnost.

Usvojena su četiri amandmana Lazara Prodanovića – amandman 1. sa 25 glasova "za" i četiri "suzdržana"; amandman 2. sa 25 glasova "za" i šest "suzdržanih"; amandman 3. sa 24 glasa "za" i šest "suzdržanih" i amandman 4. sa 25 glasova "za" i šest "suzdržanih".

Nakon glasanja o amandmanima, Dom je, sa 28 glasova "za" (Federacija BiH 17, RS 11) i pet "protiv", usvojio Zakon o radijacijskoj i nuklearnoj sigurnosti u Bosni i Hercegovini.

Ad – 7. Prijedlog zakona o izmjeni Zakona o Službi u oružanim snagama BiH - drugo čitanje

Kratke uvodne napomene dao je predsjedavajući Doma.

Nije bilo rasprave.

Sa 25 glasova "za" i četiri "suzdržana", usvojen je Zakon o izmjeni Zakona o službi u Oružanim snagama BiH.

Ad – 8. Prijedlog zakona o visokom obrazovanju u Bosni i Hercegovini - prvo čitanje

Poslije uvodnih napomena predsjedavajućeg, u ime Ustavnopravne komisije govorio je predsjedavajući te komisije Šefik Džaferović.

U raspravi su učestvovali: Zlatko Lagumdžija, Sadik Bahtić, Šefik Džaferović, Ekrem Ajanović, Slavko Jovičić, Denis Bećirović, Momčilo Novaković, Branko Dokić, Rifat Dolić, Velimir Jukić, Azra Alajbegović, Jozo Križanović, Adem Huskić, Martin Raguž, Milorad Živković i Drago Kalabić.

Poslije rasprave, predsjedavajući je prvo na glasanje dao prijedlog zaključka koji je u raspravi predložio Zlatko Lagumdžija, a koji glasi:

„Zadužuje se Vijeće ministara BiH da, na osnovu dosadašnjih rasprava, izradi prečišćeni prijedlog zakona koji će biti dostavljen u parlamentarnu proceduru po hitnom postupku.“

"Za" prijedlog zaključka glasalo je pet poslanika, 24 su glasala "protiv", tri su bila "suzdržana". Prema tome, predloženi zaključak nije usvojen.

Nakon glasanja o prijedlogu ovog zaključka predsjedavajući je na glasanje dao Prijedlog zakona u prvom čitanju. Prijedlog zakona usvojen je sa 22 glasa "za" (Federacija BiH 13, RS devet), pet "protiv" i devet "suzdržanih".

Zatim je, na prijedlog predsjedavajućeg, usvojen prijedlog da se pređe u drugo čitanje ("za" glasalo 26, "protiv" šest, "suzdržala" su se četiri poslanika).

Predsjedavajući je podsjetio da su, u skladu s Poslovníkom, u plenarnoj fazi amandmane podnijeli: Šefik Džaferović – jedan amandman kojim osporava amandman br. 11. Ustavnopravne komisije; Martin Raguž podnio je dva amandmana koje ponovo brani u plenarnoj fazi.

Milorad Živković podnio je dva amandmana kojima se u članu 20. i 59. usklađuju propisani rokovi. Predsjedavajući Ustavnopravne komisije je u vezi s ovim rokovima zatražio objašnjenje ministra civilnih poslova.

Ministar Sredoje Nović pojasnio je da se u odredbama na koje je Živković podnio amandmane radi o tehničkim ispravkama i da su amandmani opravdani.

U raspravi su dalje učestvovali Zlatko Lagumdžija i Šefik Džaferović. Zatim je predsjedavajući na glasanje dao amandmane.

- Nije usvojen amandman Šefika Džaferovića – "za" je glasalo 11, "protiv" 17, "suzdržalo" se pet poslanika.

- Nisu usvojeni ni amandmani Martina Raguža. "Za" 1. amandman glasalo je devet, "protiv" 22, "suzdržalo" se pet poslanika. "Za" 2. amandman glasalo je devet, "protiv" 20, "suzdržala" su se četiri poslanika.

- Usvojena su dva amandmana Milorada Živkovića – prvi sa 31 glasom "za", jednim "protiv" i četiri "suzdržana", a drugi sa 29 glasova "za", dva "protiv" i četiri "suzdržana".

Nakon glasanja o amandmanima Dom je, sa 22 glasa "za" (Federacija BiH 13, RS devet), pet "protiv" i osam "suzdržanih", usvojio Okvirni zakon o visokom obrazovanju u Bosni i Hercegovini.

Ad – 9. Prijedlog zakona o Agenciji za predškolsko, osnovno i srednje obrazovanje - prvo čitanje

Poslije uvodnih napomena predsjedavajućeg, u raspravi su učestvovali: Denis Bećirović, Vinko Zorić, Sadik Ahmetović i Šefik Džaferović.

Sa 23 glasa "za", četiri "protiv" i pet "suzdržanih", Prijedlog zakona je usvojen.

Presjedavajući je dao na glasanje i prijedlog za drugo čitanje. Usvojen je sa 23 glasa "za", šest "protiv" i tri "suzdržana".

Predsjedavajući je podsjetio da nema amandmana u plenarnoj fazi. Nije bilo rasprave u drugom čitanju pa je predsjedavajući proveo glasanje.

Zakon o Agenciji za predškolsko, osnovno i srednje obrazovanje usvojen je sa 24 glasa "za" (Federacija BiH 16, RS osam), četiri "protiv" i pet "suzdržanih".

Ad – 10. Prijedlog zakona o izmjenama i dopunama Zakona o Vijeću ministara BiH - prvo čitanje

Nije bilo rasprave o ovoj tački dnevnog reda.

Prilikom glasanja Prijedlog zakona nije dobio entitetsku većinu. "Za" je glasalo 18 (Federacija BiH 17, RS jedan), "suzdržalo" se 13 poslanika.

Predsjedavajući je konstatirao da slijedi usaglašavanje u Kolegiju kao komisiji.

Ad – 11. Prijedlog zakona o izmjeni Zakona o administrativnim taksama BiH - prvo čitanje

Na početku rada po ovoj tački dnevnog reda Jozo Križanović primijetio je da sjednici Doma ne prisustvuje niko iz Vijeća ministara BiH, pa je skrenuo pažnju na odredbu člana 68. Poslovnika, u kojoj se kaže da članovi Vijeća ministara BiH imaju pravo i dužnost učestvovati na sjednicama Doma, te da, u slučaju odsustva predlagača, Dom može odlučiti da li će raspravljati i bez prisustva predlagača. Naglasio je da se ne radi o prisustvu pomoćnika, već ministara i da bi već jednom trebalo uozbiljiti rad Doma. Predložio je da se Dom izjasni da li će se danas raspravljati o materijalima i bez prisustva predlagača.

Milorad Živković je u vezi s intervencijom Križanovića rekao da razumije njegov zahtjev, te da su predstavnici Vijeća ministara BiH bili na komisijama i da niko nije zatražio nikakvo objašnjenje u vezi s ovim prijedlogom zakona. Iznio je stav da nije potrebno ovaj prijedlog zakona odgađati jer je sve prošlo kroz komisiju bez amandmana.

Predsjedavajući Belkić naglasio je da je poslanik Križanović tražio da se Dom izjasni da li će se nastaviti rad i bez prisustva predlagača, pa je prijedlog dao na glasanje.

Sa 19 glasova "za", 10 "protiv" i dva "suzdržana", Dom je odlučio da se nastavi rad i bez predlagača.

O ovoj tački govorio je Vinko Zorić.

Sa 28 glasova "za" i šest "suzdržanih", usvojen je Prijedlog zakona u prvom čitanju.

Ad – 12. Razmatranje Incijative Denisa Bećirovića sa 9. sjednice Doma, održane 23.5.2007.

U uvodnim napomenama predsjedavajući Belkić podsjetio je da je Ustavnopravna komisija dostavila Izvještaj u kojem je podržala Incijativu Denisa Bećirovića i isto predlaže i Domu. Rekao je da, ukoliko i Dom prihvati Incijativu, ostaje obaveza komunikacije s lokalnom zajednicom u Trebinju da se sagledaju mogućnosti realizacije te inicijative, te da se moraju respektirati i stavovi lokalne zajednice u vezi s ovim pitanjem.

Nije bilo rasprave pa je predsjedavajući proveo glasanje.

Sa 29 glasova "za" i pet "suzdržanih", prihvaćena je inicijativa kojom Dom zadužuje Vijeće ministara BiH da, u saradnji s nadležnim organima Općine Trebinje, finansijski pomogne izgradnju spomenika Srđanu Aleksiću u Trebinju.

Ad – 13. Davanje saglasnosti za ratifikaciju:

- a) Evropske povelje o regionalnim ili manjinskim jezicima – Strazbur, 5. novembra 1992. godine,
- b) Konvencije za objedinjavanje određenih propisa u međunarodnom zračnom saobraćaju,
- c) Sporazuma između Vijeća ministara BiH i Vlade Republike Hrvatske o saradnji i nadzoru prelaska granice,
- d) Privremenog ugovora o slobodnoj trgovini između Vijeća ministara BiH i Misije

privremene uprave Ujedinjenih naroda na Kosovu.

Predsjedavajući Belkić rekao je da za Evropsku povelju iz podtačke a) nije dostavljeno mišljenje nadležne komisije, a da se o ostalim aktima iz ove tačke Komisija za vanjske poslove pozitivno izjasnila.

Predsjedavajući Komisije za vanjske poslove Slavko Matić obavijestio je Dom da prilikom razmatranja Evropke povelje o regionalnim ili manjinskim jezicima nije bio prisutan niko od podnosilaca Povelje, tako da se Komisija iz tog razloga nije izjašnjavala, jer je ranije usvojen zaključak da se ne izjašnjava o materijalima čijih predlagača nema na sjednici Komisije.

Poslije izlaganja predsjedavajućeg Komisije za vanjske poslove, predsjedavajući Doma Beriz Belkić konstatirao je da se Dom ne može izjašnjavati o spomenutoj povelji jer nema mišljenja nadležne komisije. Zatim je, na prijedlog Novakovića, proveo odvojeno glasanje o aktima pod b), c) i d).

Dom je dao saglasnost za ratifikaciju:

- b) Konvencije za objedinjavanje određenih propisa u međunarodnom zračnom saobraćaju (jednoglasno);
- c) Sporazuma između Vijeća ministara BiH i Vlade Republike Hrvatske o saradnji i nadzoru prelaska granice (jednoglasno);
- d) Privremenog ugovora o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu (27 "za", četiri "protiv" i tri "suzdržana").

Ovim je realiziran usvojeni dnevni red .

Sjednica je završena u 17,30 sati.

Sastavni dio Zapisnika je transkript 10. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Beriz Belkić